



JUDICIAL SYSTEM MONITORING PROGRAMME
PROGRAMA DE MONITORIZAÇÃO DO SISTEMA JUDICIAL

KOMUNIKADU IMPRENSA

Periodu : Novembru 2009

Edisaun : Novembru 2009

**KONTROVERSIU SUBSTITUISAUN EQUIPA ADVOGADO BA KAZU
“ATENTADU 11 DE FEVEREIRU”**

Komesa iha loron 16 de Novembro 2009 arguida AP) sei hetan assistensia legal husi ninia advogado privado internasional Dr George Barbosa nu'udar advogado ne'ebe substitui ba Dra Zeni Alves Arndt, ne'ebe durante ne'e fo assistensia legal ba AP. Substituisaun ne'e tanba Dra Zeni Alves Arndt, ne'ebe oras ne'e dau-daun tuir informasaun husi Tribunal Distrital Dili katak nia remata ona ninia kna'ar. Razaun seluk tanba ninia familia ne'ebe mak nia husik kleur ona iha Brazilia.

Prosesu substituisaun advogada privada AP, husi Dra Zeni Alves Arndt ba iha Dr George Barbosa sein iha informasaun uluk hamosu reasaun maka'as husi Ministeriu Publiku Dr Felismino Cardoso iha inisiu julgamentu tanba tuir Dr Felismino Cardoso katak qualquer advogado ka defensor publiku ne'ebe atu hala'o kna'ar iha tribunal iha estado Timor Leste tenke iha lisensa husi sistema judicial Timor Leste.

Tuir pozisaun Ministeriu Publik, Dr Felismino Cardoso fo hanoin katak tuir loloos substituisaun advogado privado ne'e tenke iha lisensa antes., Maibe preukupasaun ne'e hetan reazem no kontestasaun husi defensor balun hanesan Dr Andre Fernandes no Dr Manuel Sarmiento ne'ebe dehan katak Defensor Dr George Barbosa hanesan advogado ne'ebe mak kleur ona hala'o ninia kna'ar nu'udar advogado iha tribunal tomak iha Timor Leste. Sira mos subliña liu tan katak advogado refere iha qualidade ne'ebe diak atu ajuda/apoiu prosesu julgamentu ne'ebe Estado Timor Leste presiza durante ne'e inklui mos atu fo assistensia legal ba kazu attentadu 11 de Fevereiro 2008. Tanba ne'e, tuir sira katak la presiza tan iha lisensa antes ba hala'o funsaun ne'e, tanba advogado ne'e rasik hatudu tiha ninia kredibilidade wainhira fo assistensia legal ba ninia kliente.

Iha parte seluk Juis ne'ebe mak preside julgamentu ne'e afavor ho prezensa husi advogado privado Dr George Barbosa tanba konsidera la fo impaktu aat ba prosedimentu julgamentu no karik ho mos prezensa husi Dr George Barbosa haré hanesan ajudu ida ba julgamentu iha kazu ne'e.

Bazeia ba Artigu 135 (1) Konstituisaun RDTL haktuir katak katak ezersisiu assistensia juridiku ne'e interese social ninian, tanba ne'e advogado no defensor sira tenke hala'o sira ninia kna'ar tuir prinsipu ida ne'e. Tuir mai alinea segundu husi artigu ne'e mos

haktuir katak advogado no defensor sira ninia funsaun principal maka fo kontribuisaun ba administrasaun justisa ninian ida be diak no salvaguarda sidadaun sira ninian direitu no interese legítimu.

Relasiona ho asuntu ne'e, tantu iha Konstituisaun RDTL, no Kodigu Prosesu Penal la fo proibisaun ka impedimentu ruma ba kada advogado ida atu halo ka fornese substituisaun assistensia ba sira ninia kliente.

Kodigu Prosesu Penal Timor Leste artigu 66 iha ne'ebe mos eskreve konaba "Defensor" liuliu iha artigu 1 katak "arguidu iha direitu atu konstitui nia defensor ka atu hetan defensor nomeadu ba nia ofisiozamente ka tuir rekerimentu".

Aleinde provizoins konstitusional no prosesual hirak ne'e, iha Artigu 35 no 36 Lei Nu. 11/2008 kona-ba Rejime Jurídiku Servisu Advokasia ne'ebe defini kona-ba Inkompatibilidade ba Ezersisiu Advokasia no Impedimentu Ezersisiu Advokasia, la iha klauzula ruma ne'ebe iha indikasaun atu suspende no impede involvimentu Advogado refere iha kazu ne'e.

Refere ba baze provizionál hirak ne'ebe haktuir iha leten, JSMP hanoin katak involvimentu Advogado Dr George Barbosa atu hala'o funsaun nu'udar advogado hamutuk ho equipa advogado ba arguida AP la persiza sai kestaun kontroversiu, tanba la iha lei ruma ne'ebe fo fatin atu impede nia involvimentu iha kazu ne'e.

Atu hetan informasaun kle'an favor kontaktu:

Luis de Oliveira Sampaio

Direitor Ezekutivu JSMP

Diresaun E-mail: luis@jsmp.minihub.org

Landline: 3323883